

全
浙
詩
話

全浙詩話卷四十三

會稽陶元藻篁村輯

男廷珍
廷琬
編次

仁和朱文藻映潛

參訂

同邑宗聖垣芥颿

國朝

葉永堪

永堪字更生金華人

風雅閒談 更生謂六言詩起於唐元宗之謫仙怨此
未必其然惟劉長卿竇宏餘宋康駢三人和詩獨取宋

作其詞與吹笛本懷庶兩全無憾却確有見解所和三
作亦惟和宋韻者爲佳詩云風塵此日彌天惆悵三軍
不前鑿響雨淋駱谷笛吹月滿秦川英異爲河爲嶽窈
窕疑霧疑煙今夕難忘哀怨衷情訴與嬋娟

按元宗幸蜀次駱谷曰朕倉皇出狩未辭宗廟此山
高望見秦川當遙辭之因下馬東向再拜嗚咽曰吾
用九齡語何有今日命中使往韶州祭之遂索笛吹
曲有司錄成譜駕至成都乃進此譜請曲名帝曰吾
思九齡亦別有意可名爲謫仙怨西川人傳得者呼
爲劍南神曲過劍閣時聞雨聲感懷貴妃製雨淋鈴
曲則謫仙怨與雨淋鈴原截然兩曲一憶九齡一念
貴妃亦顯然可見因其有亦別有意之語遂疑兩事
併在怨中大歷以後和者頗多流傳後世且有名者
祇三人劉長卿第寫自己惆悵與元宗事已無干涉
竇宏餘又專寫貴妃殊失謫仙怨本意宋康駢則兼
言二事亦屬揣測爲之今人但知幸蜀有雨淋鈴曲

并不知有
謫仙怨矣

周之麟

之麟字石公蕭山人康熙庚戌進士授翰林院
編修官至通政司使

詩衡 公於詩非所長然未嘗無酬應會見其送友人
下第南歸詩云江南歸憩好林泉莫感孫山便泫然相
待重來雙鳳闕春風得意杏花天其居家在官悉醇謹
與世無忤人以周老佛稱之故吐屬亦和平溫厚雖送
別詩無蕭颯氣

汪霏

，
影字昭采號東川錢塘人康熙丙辰進士舉博
學鴻詞官至戶部侍郎

雲護齋詩話 東川居家有求見者必肅衣冠出雖溽
暑不苟所著西泠倡和詩蓋公丁憂歸里偕其門生倡
和之什也汪楫毛奇齡並序第考朱檢討曝書亭集有
題汪祭酒影詩卷後詩注云祭酒詩卷中有記得年時
重九日全家倚閣望秋山之句據此則公詩未付梓者
多矣公好禪法名開衣號果祥見僧碩公借巢集

陸 棻

棻原名世枋字義山平湖陸奎勳之祖康熙丁

未進士舉鴻博授編修歷官內閣學士兼禮部侍郎有雅評詩稿

浙江通志 葉傑直 南書房出五臺金蓮花限韻賦詩立奏稱旨

隨園詩話 平湖陸陸堂先生祖名葉字義山當國初鼎革時馬將軍兵破平湖掠其父將殺之葉才九歲伏草中跳出抱將軍膝求代將軍愛其貌韶秀取手扇示之曰兒能讀扇上詩卽赦汝父葉朗誦曰收兵四解降王縛教子三登上將臺此宋人贈武惠王詩也將軍不殺人卽今之武惠王矣將軍大喜抱懷中辟咤曰汝

能隨我去爲我子乎曰將軍赦吾父卽吾父也遂哭別
其父而行將軍爲之淚下已而將軍身故藁得脫歸康
熙己未舉鴻博入詞林上愛其才一日七遷從編修
贊善庶子授內閣學士才一年先生引疾歸又十年卒
自題華表云一日七遷千古少周年致政寸心安有病
不治吟曰無藥能延炎帝壽有人曾哭老聃來

蔡仲光

仲光字大敬蕭山人

菊坡詩話 大敬與毛大可同時詩文名甚著其涼州
辭云賀蘭千嶂朔風秋萬里黃河入塞流滿地胡笳邊

月冷最傷情是古涼州排遍云水調聞歌淚滿裾思君
遠戍十年餘秋來無數南飛鴈不寄雲中一紙書風格
頗有樊川丁卯之遺

李良年

良年字武曾秀水太學生舉鴻博放歸有秋錦
山房集

曝書亭集 武曾九齡能作文十齡解賦詩持格律甚
嚴嘗鈔撮詩中禁字一卷授學者

嘉興府志 武曾與兄繩遠弟符言詩者稱三李

單隆周

隆周字昌其蕭山人諸生著有雪園集

詩衡 雪園詩洗盡浮囂獨存渾樸五言如人聲連樹

隱海勢入船遙檻邊平楚斷花外一僧歸浪白衣逾薄
風多酒不堪七言如賢否畏從間里定貧窮獨與故人
親林間宿鳥衝人去天末寒雲渡水來一自干戈連歲
月幾回詩酒失生平夜戶一緡朝乞糴孤嫠盃酒暮澆
墳等句皆中晚警句又秋懷云澗纏雲氣連波白臺殿
虛無勝蹟湮地接春陵終爲漢沙名博浪本權秦侯王
賓客藏屠狗梁苑衣冠理釣緡慘慘魯陽城欲暮何曾
見有荷戈人凌虛仙馭羨騎羊欲往相從路渺茫澣畔

盲風沈玳瑁山亭蠻雨濕桄榔威加象郡秦軍壯險據
沱江霸略長獨恨伏波銅柱短分茅不辨舊封疆此二
律直是盛唐風格矣其所爲似樂府二十八首皆前明
遺事用意沈摯古色蒼然視王仲初張文昌似非所屑
也

按雪園與毛西河生同里學同塾年又相若西河以
十歲出應童子試雪園則九歲能文列書遍讀日計
寸許一時鄉里金號神童其後西河以鴻博入
詞垣而雪園竟不得志齟齬以死豈非命哉
聖垣按雪園詩凡數變初學李長吉一變而宋再變
而爲開元天寶尤得解於少陵張邇可序其詩云每
一章一韻必舉少陵一詩以相配時歎爲知音而尤
工於樂府名語奇旨深得諷諭之體然則雪園之於
詩學爲功亦深矣豈特
天資穎異軼絕羣倫哉

吳農祥

農祥字慶伯一字星叟錢唐人諸生康熙戊午
會舉鴻博

浙江通志 慶伯宮允太冲長子少異敏一覽成誦家
有賜書鍵戶伏讀茹經涵史馳騁百家康熙戊午以博
學宏詞薦歸而著書自娛詩不下萬餘首爲文條貫五
經尤精於易與蕭山毛奇齡友善然質疑送難不肯苟
同所著有蕭臺集二百四十卷梧園雜志二十卷流鈞
集四十卷詩餘二十四卷

文潯按慶伯所居梧園在杭城孩兒巷之西地名西
牌樓吾猶及見其孫居老屋中頽然一酒徒而已問

其暑作秘不示人未幾老屋不能守舉室遷去不可
問矣 國朝兩浙詩鈔僅錄其二詩一曰松木場香
市云松木場邊春水生綠楊紅樹隱高城上方鐘磬
珠梅迴十里笙簫畫舫明芳草雉媒嬌夜雨雜花鳩
婦妬新晴武林車騎如流水閒倚青溪聽笑聲一曰
赤城步雜興詩云此地通江驛人家繞岸長山程開
薛荔水市走杭榔澤國漁樵地津亭
賈客裝喜聞豺虎靜便道入錢塘

謝于宣

于宣字來侯號月麓太平人

三台詩話 月麓寓橫山無意仕進有一帶山雲村勝

郭半篙春水土歸農之句詩集名邯鄲步

沈筠

筠字開平號晴巖仁和人康熙己未進士改庶

常又試博學宏詞入高等授翰林院編修有斗

虹集

浙江通志 筠爲文唾地立成而選簡清綺諸子百家
咸集腕下其詩容與閒易以陶徵士爲宗然未嘗以摹
仿傷格也

湖墅詩鈔 沈晴巖有秋夜偶成詩云夜靜蛩鳴苦霜
寒鶴夢醒秋聲來枕畔但覺客偏聽

包秉德

秉德字飲和蕭山人

浙江通志 飲和所著詩文蟲戈編合五十卷與來驤

陳清蔡立國沈禹錫蔡仲光爭尚著作同時齊名稱固
陵六子

方象瑛

象瑛字渭仁遂安人康熙丁未進士 召試鴻
博官編修有健松齋詩集

國朝兩浙詩鈔 渭仁嘗居松潘咸州有雪山距會城
二百餘里曉起登樓望之九峯皆白有詩云未是我眉
境何來入座看蠻中晴亦雪徼外暑偏寒雲散千峯白
霜凝萬壑丹鱗鱗望不盡指點是松潘

王暉

暉初名裴字丹麓號木菴又號松溪仁和人諸生

今世說 王丹麓年踰四十益復困頓婦戲語曰同學少年皆不賤奈何夫子獨長貧 丹麓家旣落顧時喜刻書客至質衣命酒其詩曰平生好賓客資用苦不周有懷莫可告室人且見尤施愚山誦之輒失笑曰蓋有類予者

藝苑名言 王丹麓先生暉有春風詩云聞說長安花滿城看花但覺馬蹄輕多愁不爲予吹去堪笑春風亦世情翻用羅鄴詩亦有味丹麓又有九日陰雨有感詩

薄寒細雨怯登臨羞對黃花白髮侵漫說人情多反覆
重陽也自變重陰重陰謂濃陰也東坡詩積霧開重陰
湖聖詩鈔 王松溪年十二遊庠後棄舉業專精古學
里有孝子李氏長中華次中楫萬歷二十五年二月二
十五日大火昆玉讀書湖上奔救父不得出赴烈焰抱
持而死 旌曰雙孝之門松溪有詩云往者李氏子救
父烈火裏蹈之如平地至性忘生死兄弟俱灰燼相抱
猶一體維茲祝融神施毒何至此嘆酒旣無術燎原勢
莫止瓦礫莓苔生幾帛竟難已

周起莘

起莘字次修蕭山人

詩衡 次修詩有氣岸嘗贈林爾公云洛陽花近清明
日旅况蕭條缺欲彈重看園中啼鵲滿銅駝市裏鬪雞
寒聽魚雲煖黃河度金馬雲明華嶽看別後相思君不
見幾時消息到長安過臨邛司馬相如故里云倦遊
四海却歸來意氣凌雲五色開盡道茂陵能作賦懸知
漢武亦憐才琴臺日暮多愁病酒肆人間不貫財誰有
風流還繼此古來奇遇獨徘徊

徐芳聲

芳聲字徽之蕭山人

詩衡 徽之詩有孤情盡日門高掩多病百花春未闌
之句殊饒秀逸之致

江運機

運機字上觀杭人

桂堂詩話 江運機字上觀不知其家世詩附鈍翁類
稿有和汪堯峯姑蘇楊柳枝詞云白傅遺踪半草萊李
娟張態亦塵埃依然隄柳年年在不見風流刺史來
嫋嫋亭亭故苑間昔年曾受使君攀若隨蓬鶴俱將去
爭遣移情繼小蠻

盛文美

文美字思椿山陰人康熙間隱士

康熙己亥紹興府志 文美自少至老樂善不倦晚年
參大乘明心見性竟成正果一日召親朋子姪畢集曰
昨夢西土蓮花開吾將歸極樂世界矣口占一偈曰踏
破芒鞋數十年今朝隻隻向西天瞥眼韶華忘幻影滿
庭柏子一爐烟詠畢趺坐而逝

沈 廉

廉字補隅嘉興人

國朝詩錄 補隅方壯入秦有去題百二關中壁要看
三千里外山之句聞者壯之後足跡幾徧天下而蜀遊

一集沈鬱中復極縱橫頗得杜陵氣骨一時勘摩其壘者

國朝兩浙詩鈔 沈補隅嘗入蜀有入連雲棧詩云飛棧盤空鳥路分烟嵐霧樹合氤氲人緣螳垤紛相引風遞猿聲斷更聞百道爭飛天外瀑千峯平插馬頭雲身當絕境渾忘險不覺頻穿虎豹羣

俞樵

樵字煥文號鹿柴山陰人諸生著有青鶴集

越風 鹿柴七律可與雪舫頡頏兩君皆爲留村制府重客故粵吟獨多其海上云澳門一線鎖蛟宮獅口洋

全宋詩卷四
開賈舶通龍馭日輪飛浩蕩蜃吹海市結虛空三千童
女扶桑外一代君臣絕島中親見戈船會出將可憐誰
不計奇功五六新穎工於點化

沈允范

允范字康臣號肯齋山陰人康熙丁未進士官
中書舍人著有采山堂集

越風 采山題丁繼之秦淮水閣老翁頭白是遺民歷
數風流八十春小閣慣邀都護騎雙瞳親見麗華人紅
燈舞柘長牽夢翠袖熏香尚滿身邂逅一樽殘菊裏邵
平那得似君貧過昭君里題旅店壁云幾處明妃說故

村重來北里有名存居人不識丹青怨草色都非玉塞
痕越客停車憐皓齒漢家傾國殉烏孫低徊一夜銷殘
燭似聽琵琶訴舊恩采山五七律更勝於古體視山堂
蘿村又上一層

徐 緘

緘字伯調山陰人布衣有歲星堂集

西河合集 伯調家山陰之木汀又家梅市初擅舉子
文爲雲門五子之一旣以詩古文事爭長海內而未能
委曲隨世低昂故人多媚之好鍊沖舉餐氣啜液嘗作
遊仙詩以自喻

菊坡詩話 徐伯調緘鏡湖竹枝詞云勾踐城南春水生水中鬪鴨自呼名楊花飛遲燕飛急郎進城時儂出城流螢篇云井幹星螢數點流美人腰細不禁秋水晶簾外梧桐月幾度黃昏便白頭烏棲曲云金缸熒熒角枕爛烏鵲爭枝夜將半共言妾貌同羅敷羅敷有夫妻不如便娟宛約善於言情者也

袁 杅

杅字艘齋杭州人

所知集 袁艘齋咏蜘蛛句太古結繩師爾智看誰觸網待他愚客興句古屋無人孤拜月空齋獨樹烏啼烟

春夜卽事句坐月露零蓬鬢上看山翠滴酒杯中對雪
句出門獨往渾無路破壁餘明似有鄰皆孤峭幽潔一
洗塵垢之氣

謝敬修

敬修餘姚人

山居詩話 故友謝敬修與黃岐周詩中一聯云聰明
幼女能傳業飄蕩痴兒可憶家蓋諷其寵後妻之女而
逐前妻之子也然只責爲子者不知憶父對面却是父
不憶兒含蓄蘊藉深得風人之旨惜中道早歿不竟其
學業也

沈樞元

樞元字宜士會稽人諸生著有柯亭詩草

國朝詩話

會稽沈宜士樞元工詩有吹竹集絕句每

入晚唐勝境揚州宮人斜云恩寵何常判死生玉鉤斜

近阿廢瑩雷塘帝鬼痴如舊一墜香魂舞月明楚宮怨

云巫山偏到楚疆來行雨行雲撥不開神女豈真腰更

細君王只是夢陽臺聞歌云揚州水調至今傳不管離

人尚未眠一片商音何處去分明收在淚痕邊

越風

沈翁家有園亭在春波橋畔放翁遇其故婦詩

曾見驚鴻照影來卽此地也少時觴咏其下有和主人

柯園諸景詩內有一方池澄泓可鑒毫髮其維揚懷古
云櫻笋淮南舊有厨蕪城佳麗近何如瑤花已謝仙人
觀蔓草重披故相居鹽策萬家多利藪河渠一代少成
書清時正賴非常略經國徒慙處士廬胡儀部維揚懷
古一律絕代風神此堪繼響

沈居敬

居敬字仲臨山陰人

國朝詩話 沈仲臨久客不得志遺詩兩卷多凄苦之
旨邊城雜咏云野馬悲嘶秋夜涼邊風天半葉飛揚驚
人欹枕燈明滅始信揚州曲斷腸舟中間雁云征鴻嘹

嚶向南飛回首家鄉淚濕衣此去關山無定所難將消息寄君歸可想其遇

馬濟皋

濟皋字伯槐會稽人

後甲集 馬伯槐先生年六十九歲介余門人薛人起敬韓來見其虛懷卽後生中未有也每有著作必繕寫請正不知予何以致此先生爲自壽詩三十章盡平聲之部其中如千古功名爭漢鹿百年心事負山蚊無方換骨添新病有字撐腸是故交愁來易失忘憂草老去難求不死方人間烏道九封一世事桑田海閱三皆佳

句也

許默

默字鳴一平湖人

檣李詩繫 許山人默行誼甚高婦喪繼娶馬氏初入
門情緒慘淡詰之再三乃云前夫尚存特鬻身償逋耳
急令攜歸不索其金口占一詩以送有好守糟糠到白
頭之句與趙道闇爲詩友而工力過之邵學使延齡爲
刊當湖兩山人吟稿

沈天漁

天漁字菊庄山陰人布衣

國朝詩話 山陰沈菊庄天漁至老不遇後裔式微遺稿散軼予篋中尚存二篇乃少時見賞於慕公天顏者也今錄其韓淮陰釣竿歌云人謂釣竿三尺細我謂淮陰生死繫淮陰當日未虎嘯落寞王孫只垂釣茹魚不飽體得全況逢阿母相周旋魚不易求誅少易且擲釣竿千沛季劍在手印佩肘膾等何人聽匹偶千金之重酬漂母一竿之輕還憶否淮陰江上魚嬉遊未央宮中烹走狗吁嗟乎漢王嗜殺功高臣不聞嗜殺釣魚人

孟軒

軒字來山會稽人著有待夢樓遺集

國朝詩話 宮詞高唱無過王龍標龍標後仲初最擅
名然所長在於鋪陳諷刺稍失敦厚之意自花藥而降
大抵宗仲初派會稽孟來山軒有宮詞二十二首其第
十首云敢說蛾眉迴絕倫主恩自徧漢宮春王嬙出塞
今還憶況是殷勤侍酒人第十一首云肯將歌舞誤長
安雨雪紛紛對酒看侍妾雖然金屋暖君王須念玉關
寒命意高出前人

錢 霍

霍字去病山陰人

紹興府志 霍精舉子業然不好獨好爲詩其詩自關

肝陌勁出橫貫不假雕飾而姿態橫生鄉人姚儀好霍
詩爲梓其集

國朝詩話 山陰錢去病霍有望舒樓詩集長門怨一
首予所最愛十度漢宮秋不曾聞促織一朝入長門蟲
聲始唧唧盛年差別離掩面空悲啼靜夜疑妾心傾耳
聽半音春殿昭陽歌舞空玉階白露起秋風還把鏡中
顏自看阿嬌仍是少年紅全首怨而不怒起四句極善
形容得意人忽然失意情景

按海嶼詩話專論上虞詩人中有錢霍一條云霍詩
無可考其咏土城山原作見於曝書亭集詩云西湖
明艷世間希此地曾經換舞衣春色不隨流水盡暮
山猶見彩雲飛竹垞和云江花江草滿江關浣女清

歌日暮還曲罷彩雲猶未散春風吹上土城山豈
虞邑同時別有錢霍耶疑卽山陰去病誤編上虞
又按荆山思致遲熟超新故吐屬轍未經人道如送
遠云故人萬里涉龍庭回首愁瞻北斗星莫道春風
吹不到昭君墓上草青青始覺馬後桃花馬前雪尚
是春光不度玉門關舊話也許豎闌夜泊云長水收
帆落照前停舟却道使君賢雲間一任雙黃鶴
飛出吳關不稅錢言鶴不言鴈便是慧心人語

汪鑒

鑒字惟一更字津夫號梅津餘姚人布衣有津

夫詩鈔

山居詩話

予館故山七載與汪子津夫謝子南銘倡

和二公多佳句汪如消息千秋在纖微獨夜慚五律中
勁句也七律如李潮向爲工書絆謝朓新將爽氣分亦

佳

毛可威

可威字揆臣壽昌人歲貢生

嚴州府志 揆臣少稟異姿年八歲隨父彩官華陽舟入巫峽母吳氏口占云風把官程滯可威卽應聲云人緣山色留自是以能詩名

洪昇

昇字昉思錢塘人監生

漁洋詩話 盤山釋智樸有詩名余在京師日曾定其集嘗有句云木鮓鱗甲異俊鶴羽毛青亦未經人道語

與洪昇聯句云蒼松亂插逢雲石石上苔痕虎行跡
拄杖來從飛鳥邊下視蒼茫遠烟碧昇昇客武康有句
云林月前後人谿花春夏開余亦嘗刪定其集云
洪昇昉思問詩法於施愚山先述余夙言詩大指愚山
曰子師言詩如華嚴樓閣彈指即現又如仙人五城十
二樓縹緲俱在天際余卽不然傳作宰者飢斃木石一
次就平地築起洪曰此禪宗頓漸二義也

蓮坡詩話 洪昉思以詩名長安交遊讎集每白眼踞
坐指古摘今無不心折作長生殿傳奇盡刪太真穢事
深得風人之旨一時朱門綺席酒社歌樓非此曲不奏

線頭爲之增價乃好事者借事生風旁加指斥以致秋
谷初白諸君子皆挂吏議此康熙己巳秋事也秋谷贈
初白詩有與君南北馬牛風一笑同逃世網中之句初
白答以欲逃世網無多語莫遺詩名萬古傳又云竿木
逢場一笑成酒徒作計大慙生荆高市上重相見攜手
休呼舊姓名後庚寅九日郭于宮於花密居招同人社
集演長生殿傳奇初白老人不及赴以二絕句答之云
曾從崔九堂前見法曲依稀燄數傳不獨聽歌人散盡
教坊可有李龜年上客紅筵興自酣風光重說後三三
老夫別有燒香曲憑何聲聞斷處參感慨係之矣洪有

其名稗畦竹垞有贈洪句云梧桐夜雨詞淒絕蕭以明
珠訪偶然亦實錄也

國朝詩錄 昉思名滿京洛因演所著長生殿傳奇平
於斥革受辱又遭家難坎壈終身五十餘墮水而歿天
之厄之爲已極矣而其詩流傳人口漁洋及門中在吳
人章下餘子之上應亦可傳許之如送吳位三歸宣城
云宋家丞相後喬水到如今之子獨首處時人無此心
偶來京洛道旋返敬亭陰芳草白雲外春山深復深釣
臺云逃却高名遠俗塵披裘澤畔獨垂綸千秋一箇劉
文叔記得微時有故人

藝苑名言 釣臺詩錢塘沈昉思有一絕云逃却高名
遠俗塵披裘澤畔獨垂綸千秋一箇劉文叔記得微時
有故人斷句就石屏詩下一轉語讀之不勝慨然非徒
表光武也

東城雜記 昇號稗畦居東里慶春門少負才名尤工
院本南北曲以國子生遊都門暇取唐人長恨歌事作
長生殿傳奇一時勾蘭競鈔習之會國忌止樂貴人邸
第有演此者爲言官所劾諸人罷職昉思遂歸山左趙
公贊執信亦在譴中趙嘗有絕句云牢落周郎發興新
管絃常對自由身早知才地宜江海不道清歌悞却人

蓋自悲也朱檢討錫鬯酬昉思詩云金臺酒坐擘紅箋
雲散星離又十年海內詩家洪玉父禁中樂府柳屯田
梧桐夜雨詞淒絕蕙苴明珠謗偶然白髮相逢豈容易
津頭且攬上河船元人白仁甫有梧桐雨雜劇亦寫雨
淋鈴一曲用事可謂工切昉思後溺於烏鎮王司寇阮
亭輓詩云送爾前溪去棲遲歲月多菟裘終未卜魚腹
恨如何采隱歸苕霅招蒐弔淚羅新詞傳樂部猶聽雪
兒歌嘗欲卜居武康山不果所著稗畦詩集清整有大
歷間風格嘗有林月前後入溪花春夏開之句

隨園詩話

錢塘洪昉思昇相國黃文僖公機之女孫

壻也人但知其長生曲本與牡丹亭並傳而不知其詩才在湯若士之上曉行云唧唧晨雞鳴僕夫駕輪鞅四野絕無人但聞征鐸響夜泊云竹筏隨潮落蒲帆逐月飛維舟已深夜還上釣魚磯性落拓不羈晚年度江老僕墜水先生醉矣提燈救之遂與俱死送高江村宮詹入都五排一百韻沈鬱頓挫逼真少陵先生爲王貞女作金鑲曲云王家有女字秀文少小綽約蘭蕙芬項郎名族學詩禮金鑲爲聘結婚姻十餘年來人事變富兒那必歸貧賤一朝別字豪貴家三日悲啼淚如霰手摘金鑲自吞食將死未死救不得柔腸九曲斷遺續卧

地祇存微氣息詎料國工賜靈藥吐出金環定竟覓至
性由來動彼蒼一夜銀河駕烏鵲嗟哉此女貞且賢項
郎對之悲復憐朝來笑倚鏡臺立代繫金環雲鬢邊其
事其詩俱足千古篇終結句餘韻悠然 洪昉思咏燕
女云燕姬生小習原野春草茸茸獵城下身輕不許健
兒扶捉鞭自上桃花馬胡雅威亦咏此題中四句云螭
蟻明處綠裁領莢手纖時爲攬妝雲髻半籠花壓額巾
羅斜挂水成行

周 簀

簀字春士秀水人初名筠字青士別字簀谷布

衣著有採山堂集

漁洋詩話 周質字春士秀水人居梅里隱於市廛偶
遊嘉善假一園居停一夕嘯咏甚適遂至達旦鄰有郡
丞行署時來按部聞周詠詩聲亦達旦不成寐恚甚詰
旦遣吏勾提將加戮辱有士大夫援之乃得免或述此
事余笑曰使袁虎不遇謝鎮西幾不免虎口一座大笑
靜志居詩話 青士遭亂棄舉子業受廩賣米有拮据
家遺詩連船鬻於市者買得一船積樓下每日中交易
筐筥斗斛權衡堆滿肆讀之糠粃中其爲詩句敦字琢
不輕襲前人片語胸無柴棘急人患難視朋友如一身

人或忘大德而思小怨者不以寘諸懷也晚年詩趨率
易好與浮圖道士游題詠極多嘗醉書五言云似士不
遊庠似農曾讀書似工不操作似商謝奔趨立言頗突
兀應事還拙疎饑凍不可顧吟詩作歡娛可當一幅寫
照也

國朝名家詩鈔小傳

周箕字青士爲古今詩超超拔

俗時同里王翊范路沈進路弟子繆泳秀水朱彝尊海
寧朱一是交賞其詩與相倡和四方名士過者輒留飲
或釀金會餐泊舟於門相接也生計日窘往來嘉善桐
鄉以詩格授人每出少年子弟三五執詩卷隨之行援

止者或數日留留或不辭去嘗元日挈子改至武康銅井山尋僧轉入徑山時已昏暮去山二十里雪甚虎跡交於塗循澀路前進或哭於後不少顧遙望林中燈修修就之則僧墨痕所居僧曰山多虎居士遠來得不心動乎曰吾行不失道心一動則飽虎口矣因煨芋魁共啖留信宿乃躋巔徧歷七十二精舍而返其儻葛不羈多此類也晚年時趨率易嘗醉書五言云似士不遊庠似農曾讀書似工不操作似商謝奔趨立言頗突兀應事還粗疎饑凍不少顧吟詩作歡娛真可當一幅寫照矣

吳之振

之振字孟舉別號黃葉村農石門人有黃葉村
庄集

國朝詩話 康熙間山林詩石門吳孟舉之振最有名

黃葉村莊詩集侵食宋人五言古體黃河夫篇真追少

陵矣近體工寫景七言絕句尤足自張一軍課蠶詞十

六首描寫風俗應推絕唱第二首云孤虛旺相驗蠶符

浴種還嫌風色粗記取東南蠶室利算來把火是三姑

第三首云火盆低簇光溫涼晴日融和煖透窗舍下秀

才蒙上考頒來官紙白如霜

自注俗以官給紙糊窗蠶必大利

第四首

云三日晴和兩日陰初生蠶子細如針家人禁忌行人
絕吠犬鳴鷄亦斷音第五首云桑葉團團蠶二眠暄涼
饑飽要心堅白頭巫媪談休咎消息今年勝舊年第六
首云芹菜泥乾燕乳兒鯉魚風動柳飛絲交交繞屋啼
桑扈正是吳蠶出火時自注蠶三眠須涼夾去火
盆故俗名三眠爲出火第八
首云三起三眠日夜忙早蠶將熟恰清涼爭傳葉價俄
騰貴兩漿如飛去採桑第十三首云下路桑枝着地低
杭城多用採桑梯箕來總是三吳地物土相宜己不齊
十五首云麥收蠶熟百無憂酒釀茶香挽客留底用催
科惱官府八分秋稅己過頭

姚際恒

際恒字立方仁和人

西河詩話

節錄

亡兄大千爲仁和廣文嘗曰仁祇一學者猶是新安人謂姚際恒也予嘗作何氏存心堂藏書序以示兄兄曰何氏藏書有幾不過如姚立方腹篋已耳兄死余述兄語示立方立方卽贈余長律二十韻中有云城隈山鳥白亭下水花紅李固追隨日侯芭涕淚中深懷因令弟榮慕等蒙童其情詞篤實始知亡兄非輕許人者仁和學宮在城西之隈宮右有荷池池上有亭名琢玉亭爲坐客談讌之所城隈二句以此

宋 昱

昱字懼聞山陰人諸生

見聞隨錄 宋昱字懼聞山陰人明末諸生居江頭里
遊京師作感遇詩百首會徵宏博中書朱公尚隆素無
交酬見所作大愛之急以名上下郡邑迹之無其人疑
迹迹緇流檄僧綱司遍索諸越中諸蘭若而不知昱已
入閩終不應人以朱公愛士之篤與昱自處之高兩奇
之讀大學甚病晦翁改本之顛越紛更不啻深仇巨痛
別作古本解疏匡救之一時狃於科舉積習親知皆咋
舌相規夷然不顧也其子爲松江郡倅至其署不久卒

子亦歿竟無後當是旅居京師遇鄉人必邀至其邸脫
粟相對又時時臨岐送行無虛日有遺詩嘲之者曰十
載長安老秃鶩常將茗酒款交遊臨行更唱陽關曲送
到杭州與越州是老而髮秃故云

彭孫貽

孫貽字仲謀號羿仁海鹽拔貢鄉人私謚孝介
先生有茗齋集

櫺李詩繫 孫貽所著詩詞樂府共數十卷其佳句如
包山云瘦林時見石渴澗亦生泉雷澤云歸穴龍收雨
空梁鶴伺魚山行云山平雲繞碓雨細犢犁煙踏春云

柴門細草臨漁步花塢斜陽隔磬聲有感云十年心事
揮杯盡百歲身名掩鏡中除夕云行雖負俗猶佳士劍
卽無成喜俠兒出郭云經旬斷客鳥窺戶三日無詩花
笑人海濱云身非鮫客還多淚跡似閒雲只戀山秋柳
云少更幾何無奈老樹猶如此可憐人崑崙山云黃精
採罷春盈握白鶴歸來雪滿身皆警動可喜

李符

符字分虎號耕客嘉興人應徵曾孫

櫺李詩繫 梅里李氏多才符與繩遠良年齊名時號

三李善詩詞尤工駢體嘗遊演遇碧鷄山道士日子前

身廬山行脚僧也後十年當歸廬山康熙甲子予在京
師分虎亦館於龔氏往來唱和月舉一會同賦者晉江
黃虞稷大梁周在浚太原閻若璩寧波萬言錢塘洪昇
嘉興周篁河中吳雯遼陽佟世恩武林王嗣槐同里沈
奕日暨我兩人也分虎嘗自言將老於桃鄉屬余作詩
詠之丁卯予再入燕分虎已遊閩矣己巳之正月予泛
艇過其家時兩岸燒燈溪光如畫因出酒果話舊并以
行脚圖索題分虎亦題予春山圖又言旦晚當再踰仙
霞予勸之早爲買山之策四更始別未幾聞其卒於途
次回感故人不無撫卷揮涕云

錢景

景杭州人

西河詩話 立夏前一日杭郡諸名士集東城約園作
送春詩其時彙筆數十人多有佳句惟末座錢景年最
少獨集唐二首其一三四王建杜甫句每度暗來還暗
去暫時相賞莫相違其二五六用翁綬白居易句百年
莫惜千回醉一歲惟殘半日春各相顧嘆絕

柯炳

柄字煒昭嘉禾人

橋李詩繫 煒昭讀書能深思語言必楚楚有風致堯

峯汪琬以爲沈靜爽拔煒昭兼之年二十三以病療天
詩名蘭唐集詞名笙囊瑣語幼時作小詩有牀前花影
好但恨不能攀之句識者以爲詩識

何之杰

之杰字伯興又字毅庵蕭山人

西河詩話 上南巡至浙浙士人爭爲恭迎 聖駕詞
南巡頌諸詩予邑何毅庵名之杰前朝老名士年七十
矣感 聖恩之深亦賦南巡詞於稠人迎 駕之際上
之時獻賦頌者大江以南日以千計旣 上還宮特稱
之杰詞諭督臣王鵬取本人年貌佳止履歷回話是何

睿鑒之神直於千百人中獨拔此名士暗中摸索毫
絲不爽如是也其詩凡十章每章六句曰聖德巍巍曰
聖功晁晁等海寧查太史昇爲之跋云 聖鑒所見因
足慰毅庵生平稽古之力然非草茆至誠實有感動亦
焉能相孚若此此真名言

按毅庵江陵女歌江陵女兒子慣食江陵魚祝郎好
網絲不近石牛渠又上篙江水沈下篙江水浮送郎
江上水相抱江津頭長于曲云我儂小艚船載歡
大航船願得合篙穩共出買渡錢亦古拙有味

盧選

選字商衡東陽人有志陶集

金華詩錄

盧秀才檀云志陶集已散佚不傳其友俞

端士鈔一帙藏之足見良朋之誼句如山花明夕磴露
樹淡烟嵐句成喜未經人道境絕曾疑有夢遊僧歸竹
院烹茶綠人坐花陰對酒紅皆佳

曹偉謨

偉謨字次典秀水人

槐塘詩話 秦淮詩鈔四卷 國朝前輩紀遊之作漢
陽羅魯峯世珍裒輯李曹次典偉謨十絕風調最佳
錄其三首舊院蘭房曲曲深珠簾步障畫沈沈花香斷
處衣香接一寸光陰一寸金藩邸初來樂事奢中官四
出選良家一朝馬上琵琶去井底從無張麗華戲演魚

龍夜不眠梨園牌號阮家編輕輕斷送南朝事一曲春
燈燕子箋

曾益

益字謙受號鶴岡山陰人

漁洋詩話 會稽曾益注李長吉詩世知之矣晚又得

其所注溫岐八義集乃吳郡顧氏刻本宋天社任淵注

朱景文黃山谷陳後山三集可謂獨爲其難於益亦然

按謙受能注詩必長於詩余訪求數十年不得其一
字寶意先生竭力搜羅亦祇得其禹廟畫龍歌一首
載入越風吉光
片羽殊可珍也

許箕

箕字巢友平湖人

平湖縣志 巢友性孤介梅里周箕好結客而箕閉戶
獨吟嘗戲語箕曰與爲熱周寧爲冷許時人稱之家海
寧屢遊湖中交諸名士尚氣誼其東湖留別詩云解將
劍挂徐君樹不學袍襟范叔寒風規良可挹也著有抱
膝軒詩

何嘉珩

嘉珩字玉羽山陰人明經

後甲集 今年玉羽下世老成凋謝無幾存者矣玉羽
爲考功何昭侯先生次子生平以七律擅場彌留時猶

口占數詩懷我同人其中警句如竟歸何處披帷在路
到懸崖撒手行宿世真神物也竹窗坐雨嘗錄古詩十
數首寄予云原稿汗碎已付祖龍不知今尚存否其哀
江頭一首與平生手筆大異附錄於此擊鼓何不揚刁
斗志金穀衆心結爲城心潰城乃肉寶藏滿篝車夢夢
丁百六似有所指也

全浙詩話卷四十三終

全浙詩話卷四十四

會稽陶元藻篁村輯

男

廷珍

編次

廷璫

仁和朱文藻映滢

參訂

同邑宗聖垣芥駟

國朝

傅廷標

廷標字半村錢塘監生

雨村詩話

半村工於詩畫竹垞翁叙其詩惜未付梓

晨遊破山寺句石上葉聲老水邊雲氣重過平山塘句

老碧上疎柳餘紅點敗荷觀海句島痕浮髮細帆影落
天空咏柳句夜夜鳥啼南北路年年人送短長亭咏燕
句磯畔雨昏芳草路樓頭人倚夕陽天神味俱入唐賢
之室

虞懋殿

懋殿字虎臣東陽人

金華詩錄 虎臣詩頗工於結聯使意不竭遊壽山追
憶黃晉卿詩句有感云徘徊重憶前人咏又見華胥一
局殘立春先一夕同君調集許若梅亭小飲云流連卜
夜難爲別共待春光逐曉來夜飲水月軒樓中云是處

煙霞收拾盡山儂歸去也風流春日過北溪稚舍云何
日結茅亭子就看花問酒共閒人一陽下浣浣李秀甫
寫真云晚晚倘容置邱壑煩添藤杖倚春風重訂舊園
詩社云行藏我輩總休問且索梅花笑倚樓又題半軒
云白飽黑甜吾事畢悠悠此外付殘年殊覺纏綿有致

金壇

埴字小郊山陰人

西河詩話 予郡金埴字子藏爲太常卿楚畹公孫一
目有重瞳子其母弟馬君挾嶺表一扶乩客來見埴驚
曰此南唐李後主後身也初不信旣而閱陸游南唐書

則後主亦名煜亦一目有重瞳子太常笑曰焉見此客
不經讀南唐書耶後子藏以二十中順治戊戌進士授
郟城縣知縣康熙庚戌罷官甲戌死考後主於南唐建
隆三年壬戌卽位至開寶七年甲戌而國亡身殞史所
稱宋師下江南削開寶年號而降稱甲戌是也如是則
亦奇矣後其子植作哭父詩一十二首其一曰天生吾
父有奇因襁褓時曾遇異人爲指終身官祿相南唐後
主是前身二曰目開一覽世全空爍爍金生阿堵中莫
道驚人鳴太早最驚人處是重瞳此實錄也

沈季友

季友字客子號南疑平湖人康熙丁卯副車

西河詩話 舊制館規不隨例 朝參不捱直今則逢

五隨 朝掄次入直每直館紙窗土坑觀諸筆帖式雜

坐翻清晝長院靜別是一境當湖沈客子作燕京春咏

五十首中二首有相似處爲畧纂數字書壁每見之輒

爲一笑曉直將歸數八磚但逢三五去朝天東堂新有

承恩事大例關支月進錢暖牖新鋪小坑床乳茶紅映

玉壺光日長院裏無宣喚翻得新書又幾行 燕京春

詠有云春店烹泉開錦棚日斜宮樹散啼鶯朝來漫點

黃柑露馬上新茶已入京故事茶綱入京各衙門獻新

茶今尙循故事每值清明節競以小錫瓶貯茶數兩外貼紅印籤曰馬上新茶時尚御皮衣啜之曰江南春色至矣客子諸詠皆實事是王建宮詞體故善述時事爾

胡少參

少參山陰人

西河詩話 予兩觀趵突泉一在乙巳一在丙寅皆辨明驅驟急觀便行不能有詩後在舟中談胡少參谷園集有過趵突泉詩歷下名泉稱趵突浪花奔湧雪花開何知十六年前客今日看泉恰又來爲之悵然少參爲山陰少保公哲嗣其詩盛爲當時所推吳門汪編修卽

少保門下士生平以宋詩爲宗其序少參詩尚曰詩莫盛於唐唐莫盛於開元天寶之際杜子美李太白王摩詰其尤學所師承也胡子詩其能宗太白摩詰而得其正者與則少參可知矣

厲雲程

雲程餘姚人

山居詩話 過費氏瓶廬五律予與沈子南谷各有和詩然皆不及厲子雲程切瓶字而聲調自然有客驅車入無人索酒嘗一聯可稱絕調

王龍光

龍光字幼譽會稽人諸生

康熙己亥紹興府志 范忠貞公承謨巡撫浙江聞龍
光名延之課子承謨遷福建總督邀龍光同行耿精忠
作亂承謨以罵賊不屈被幽囚龍光與無錫嵇永仁攜
手偕行逆卒狎狎窘辱之驅至積屍間二人自分死矣
俄牽入殿前授筆札令草安民檄啖以官二人不可逆
黨李明經者詭以好辭陳禍福勸受僞命卒却之遂羈
獄中困頓不可忍永仁歷叙諸境爲百苦吟龍光和之
又自著養花說在獄三年康熙丙辰 王師破仙霞嶺
精忠迎降欲飾詞而死慮承謨白其實遂害承謨并及

龍光康熙四十七年特贈修職郎國子監助教

按幼譽既有百苦吟之和則生平必工詩惜其稿竟無傳者福州范忠貞祠在烏石山上松柏數百本陰濃盤鬱幼譽與無錫嵇留山雲間沈天成並配享祠中

馮念祖

念祖字文子錢塘人官至泰州知州有快雪堂

詩鈔

雲蘄齋詩話 文子初至京師同陸冰修萬季野陸翼王徐敬可周青士王崑繩陸冠周畢雨稼張宏遠諸名宿結吟社於盤石庵踳踳名塲數十年晚始出宰禮縣湯少宰贈句云風雪一官遲亦可哀已

沈湛

湛字淵伯嘉善人

櫛李詩繫 湛讀書論文最嗜班馬依人入閩刻閩遊
草評者謂其詩崢泓蒼健善爲悽惋之詞

任俠

俠字五陵會稽人

見聞隨錄 五陵以氣矜自雄遍遊嶽瀆探峨嵋鴈宕
之勝一一紀之以詩與沛縣人孝廉閣爾梅江善詩亦
絕似之同時徐緘伯調錢霍去病姜梗鐵夫諸朗良月
鄉人中稱錚錚不如也其集號亦言

諸朗

朗字良月山陰人

見聞隨錄 良月文懿公大綬之後裔也耽吟咏自名其集曰越騷室如懸罄以窮老死金雪岫煨嘗瞻養之性情偏枯坐卧數憎久之亦謝去越風中有古今體數十首

沈紹姬

紹姬字香巖錢唐人有寒石詩鈔

寒石詩鈔序

郎星撰

香巖十二屬文便學爲詩方其經

營慘淡時嘗竟日不暇食家人至掣其筆不得與會所

及搖筆而書雖驚雷迅電風雨驟至未嘗遷坐若勿聞也香嚴能楚詞尤工賦駢體最麗其詩不專一家言查東山先生稱其填詞第一以余視之固未易優劣也

按紹姬寄懷查伊璜詩云蘇晉堂前宜繡佛馬融帳後有金釵用典工整投贈詩中不易得也詠古云脫穎人成公子名不然碌碌竟何稱夷門虛已真知己莫繡平原繡信陵將報韓仇奮一推副車雖誤亦雄哉淮陰也是韓王後何用當時躡足來此二首語未經人道而沈著頓挫能見於七絕中尤非凡手可及淮陰侯詩分羹父子思猶薄推食君臣誼豈終一聯似從方孝儒劍臺詩糟糠之誼尚如此貧賤之交可知矣脫胎却各臻其妙

楊模

模字子式仁和人

國朝詩錄 楊子式以孝聞生平不惑二氏布衣中有
卓識者閏六月初七夜月有詩云南訛莫認火西流顧
兎高懸略似鉤四日龜生方入夜七回紉上未成秋先
期乞巧穿鍼線後月舒光照女牛半露姮娥能却暑廣
寒深處玉爲樓

吳學濂

學濂字曦洲休寧人仁和籍諸生有香雪堂集
國朝詩錄 香雪堂詩集中有楊椒山公祠一詩云祠
宇重新古驛旁姓名猶覺滿城香五姦已褫權臣鬼一
疏堪爭烈日光謝却蟒蛇真有膽撐將鐵骨不隨楊階

前請鑄分宜像斫地行人共激昂滿城香不隨楊者椒
山朝審詩中字末則用岳墓鑄秦檜像事也

楊復震

復震字雷起號南屏臨海人拔貢生

三台詩錄 南屏嘗以長律寄張延博有芙蓉幕裏秋
深淺烏鵲橋邊事有無之句張答詩石井草枯啼鳩老
茂陵刺有病相如云云蓋彼此交有客病無聊之感焉

王錫

錫字百朋仁和諸生著嘯竹堂集

隨園詩話

吾鄉王百朋先生過李白廟云氣吞高力

上承識郭汾陽只此十字可以概李白生平

何文燝

文燝字彛魚蕭山人西堰父

討衡 彛魚五言如牆矮看山近林疎受月多蔽月雲
輕薄含煙樹有無七言如老辣獨存薑桂性如君那得
不長貧春愁如海言難盡縱在無聊兩字中雖淺近語
自佳

項溶

溶字霜田仁和人
有北遊稿

東城雜記 項溶字霜田居東街少司馬眉山先生景

襄之仲子也少豪蕩及長折節讀書以太學生赴京兆
試所交遊多四方名士聲稱藉甚然數奇試屢墮歸而
從酒人游嘗露頂短衣持蓋障日行市中軀幹偉然性
愛滑稽時於廣坐中有所調笑或作爲詞曲輒被輕薄
子傳述人以是多畏之晚年竟淪落而卒余於嗣子處
覓得其北遊遺藁一卷錄三首於此青駝寺云得得蹄
聲近前村燈火微山川非故國塵土上征衣見月人投
店聞言犬出扉昔年曾此宿殘夢尚依稀羊流店云三
公寧折臂一紙是勘吳策馬登前嶺回鞭問僕夫寒煙
低遠樹落日淡平蕪陳跡茫茫處豐碑得在無齊河縣

云日晏停鞭未猶餘半日程圓沙明野渡老屋帶孤城
石迸車聲疾衣沾柳絮輕年年新漲發碧浪比橋平

徐 穎

穎字巢友海鹽人

炙硯瑣談 海鹽徐巢友穎康熙初結廬茅峯往來句
曲道上雙髻道眼騎紫牛導以孔雀道路以神仙目之
嘗作梅花詩三十首吟行不輟旁若無人猶記其數聯
如空山相對靜如夜淡到溪雲亦是塵流水在門行處
冷斜陽銜樹望來空蠟屐此生能幾兩蹇驢明日又孤
邨古榦辟塵終化石空香入劫不成灰幽光瀉出水連

屋積氣凝爲冰滿湖過牆新水浴眠鶴壓屋冷雲驚定
僧真不食烟火人語也

馬登瀛

登瀛字國士錢塘諸生

湖墅詩鈔 馬國士初應童子試錢塘縣取第一學使
張公試之不錄適有一生兩考皆取進應扣除其一覓
卷補之錢邑以國士請學使不允自取備卷抽補之怡
得國士卷因入學爲諸生生平碌碌無所遇久困鄉塾
嘗作三詩以自譽正所以自嘲也詩云鼓吹不須蛙逢
人恣意誇百城南面擁鎮日坐蜂衙獨坐擁皋比全憑

夏楚威兒童皆股票德貌故巍巍稚子仰宗工軒軒氣
吐虹風流誰得似千古艷冬烘

沈庭楠

庭楠字蕉鹿仁和人

湖墅詩鈔 沈蕉鹿無子就膳於義男左瑞明家歿則
葬之蕉鹿賦性幽潔觀其石佛菴一詩可想見矣詩云
佛着苔衣冷僧歸古洞幽溪雲簷下宿紅樹澗邊秋

嚴 津

津字子問餘姚人

國朝兩浙詩鈔 子問有代飲詩九章今錄其一以見

大指詩云我如陶元亮飲酒復有詩李白百篇成斗酒
爲先資我輩鍾情事二公乃兼之吾尤據勝要高吟卽
清卮如或訊尊壘掩卷酒在斯

江浩然

浩然字萬原一字孟亭嘉興人著北田詩鈔

本朝名家詩鈔小傳 萬原家貧好讀書又好爲有韻
之言風雨晦明手一編不釋紙窗竹榻擁鼻作苦吟聲
時同里朱竹垞先生以鉅儒碩學爲風雅宗與新城王
尚書狎主齊盟若前代之李杜坡谷然者先生旣退居
長水則以詩學唱導後進凡經指授及私淑其門者率

振厲成一家言屈指門下士著錄不下千人而耳濡目
染守先生之微言而勿失者實惟苔岑梓里漸被獨深
萬原固於三十年後聞風而興焉者也旣家食不能自
給所爲詩人亦無知之者則挾策作汗漫游諸公貴人
爭延致幕下依綠水泛芙蓉書記翩翩固阮瑀陳琳之
流亞也其客濟南最久辛酉壬戌之間嘗一再視予館
舍酒酣以往論文較藝凡唐宋以來詩人靡不著其源
流窮其正變剖析其離合利病如堂上人之判堂下人
曲直然間偶舉及曝書亭詩句則頓足起舞側弁而哦
鉅律長篇如餅瀉水乃知平生雖廣搜博采轉益多師

而一瓣心香固近在鴛湖繡里間也歸道山後讀其遺
詩翦刻生新無西抹東塗庸耳剽目之習而亦不以搜
奇抉怪刻腎雕肝爲能事因未盛稱於世余故爲表而
出之

吳景鄮

景鄮字赤一歸安諸生有南村詩

國朝兩浙詩鈔 吳興有清遠草堂卽白蘋紅蓼處也
趙子昂舊遊地赤一與徐方虎嘗讀書其中其後追憶
恍如隔世因作詩云昔年松雪尋遊地曾向洲前采白
蘋夜月倒墮澄練碧曉山還帶彩霞新秋原寂寞悲遺

老迴閣棲遲念故人
僧喜歸來彭澤早
移尊常對百花春

姚世靖

世靖字子清號藥師平湖人諸生

詩衡 南疑嘗稱藥師爲詩秀逸一空俗調信然曾記
其憶舊一律云十三詞賦已知名日日金丸逐曉鶯楊
柳河橋春試馬杏花樓閣夜聞箏當年斷夢隨寒雨幾
處傷心爲月明最是紅顏易零落秋風愁絕庾蘭成

馮秉恭

秉恭字子近平湖人諸生

風雅閒談 子近有遠害見人低白首甘貧抵死賤黃金之句真欲擲地作金石聲但與聞蛙題有何干涉乃是借題興感南疑言其詩歌爲憤張之詞應指此類

張三省

三省字鄰曾嘉興人官閬鄉知縣

詩衡 鄰曾詩寫景最工其落帆亭云鴉雜野僧雲脚度葉隨行客馬頭飛是一幅黃鶴山人秋山遠眺圖也

沈從雲

從雲字慶林進之弟

國朝兩浙詩鈔 慶林兄弟友愛惜年皆不永而遺稿

亦多散失僅見其暮春二絕云出門風雨挾餘寒坐我
青氊一室寬盛說春光方爛漫滿溪花柳夢中看憤不
碎琴真我友貧安破屋是余師一燈萬卷春風裏獨坐
荒溪夜雨時

沈岸登

岸登字覃九號南渟又自號惰耕村叟平湖人
有黑蜨齋詩鈔

國朝兩浙詩鈔 沈南渟早歲賦遊垂四十年所與交
者若錢唐龔田居長水朱竹垞父子及李桃鄉外曾無
幾人所著詩集外尚有春秋紀異及詞賦小牘等種餘

事善畫詩有送借山和尚結茅匡廬兼爲作圖一篇云
上人廬山去索我廬山詩吾聞廬山峯頭有五老未曾
謀面心相期蒼烟纂羅入我夢艤船似到宮亭湄正是
山僧炊飯熟五百個寺攢蜂脾東林古杏千樹赤十里
五里花風吹於菟已逝不復守杏子沒脚仙人遺象珠
迸石撥苔看忽然手落青筇枝上人去踏香爐頂蘆綿
荻絮衰寬緇重陽又過風雨數白藤笠子簷深垂山中
黃葉盡覆地應笑借公來何遲爲道廬山圖未成圖成
不肯輕相貽我非慳此粗水墨苦心位置山茅茨湖山
悠悠秋水白紅橋疎柳短長絲却憶并州官閣裏明燈

對榻爭枯槁

沈不負

不負字集九號次山晚號東樂平湖諸生有老

雲齋詩刪

國朝兩浙詩鈔 沈次山嗜潔耽吟咏破屋頽垣風雨
不蔽怡然忘老陸堂詩話云清溪二沈東樂黑蜨時比
阮家咸籍余少時有和卽居百咏東樂獨賞予霜月一
題明明月曬板橋霜句謂此事當屬君矣無何二老云
亡風流淪喪東湖長此寂寂矣次山有手編韻鈔五卷
其詩初爲樵唱軒集十卷晚乃定爲老雲齋詩刪十卷

集中賦香櫞花二絕句自序云香櫞花古來詩家曾無
一字我家一樹今歲特繁憐其相對之久作二絕句此
不足爲有無或詩足以傳花人足以傳詩者繼而詠之
則此亦魚之筌也詩云黃櫞漫作盆中供復見階前一
樹花莫道藥欄春去盡便無蜂蝶到貧家舊葉未黃新
葉綠遮藏密雪被風知華清浴殿何人見雲鬢初簪未
到時

戴鏡曾

鏡曾字餘照蕭山人

詩衡

余最愛道學場中真勢利詩文句內假英雄一

聯傳誦已久初不知爲何人所作今始知是餘照集中
醉後歌也

沈應鈴

應鈴字德侔平湖人

國朝兩浙詩鈔 沈德侔性至孝母喪三年不茹葷上
綴文間爲韻語蕭然遠俗嘗題畫蘆蟹云豁眼霜空入
遠天蕭蕭蘆荻罩秋煙沙間郭索渾無賴未許閒人弄
釣舡又題畫山水云小筆風流又一新雲山落落水鄰
鄰生來不識黃塵路只合招尋畫裏人

張遠

遠字邇可蕭山人廩貢生有蕉園集

西河詩話 康熙十四年四月十八日富陽江口地名陸山者居民夜見墜二星如雷入地三尺縣令出視發掘得二石各重四斤有餘則儼然金也時傳解督撫衙門以下及邛邦梅勒等各鑄取若干余友徐隱君涵之適爲陳梅勒幣請在坐亦饋一兩同人見者皆賦詩惟張邇可詩有云紫囊羅片石青眼對兼金最爲切實隱君嘗云落星爲金甲兵林林時適有甌閩之變蓋落星不同爲石爲金爲粟麥爲飛蟲者

國朝兩浙詩鈔

張邇可蕉園集毛大可蔡仲光爲之

序有禹廟詩云伯禹留遺廟苗山對夕陽龜文餘玉字
龍影度梅梁苔冷秦碑斷峰回越望長早知疏鑿久玉
帛會遐荒

按蕉園集中詩句雖一齋半炙俱醺醺有味如金陵
懷古云千古文章空鮑謝六朝宮殿憶齊梁與友人
話舊云星霜契澗頭初白遲暮追隨眼倍青過郭隱
居遇雪云官步獨穿東郭履連床共讀北山文越王
城云一自烏鵲辭浙水遂
令麋鹿入姑蘇等句皆是

王汝爲

汝爲字志宣會稽人諸生著有籠鵝館稿

越風 志宣所存詩寥寥數首森嚴有法散朗多姿嘗
記其偶句云漢記留壇皆白壁周官職貢是丹砂史官

屢載黃龍見書麓猶存白虎通雷電欲收金薤葉琵琶
未奏鬱輪袍鄉月迥懸南斗柄客星涼繫楚江濱旅舍
夜眠金鴈驛蠻方春獻玉龍膏摘詞典贍可以覘其所
蘊矣

王先吉

先吉字枚臣蕭山人由進士官中書

菊坡詩話 枚臣登淨寺宗鏡閣有經聲竹裏逢之句
單昌其極賞之謂讀此句知棋聲花院靜不足當其一
映余竊愛其隆興寺云虛堂生夕陰此五字直到儲光
羲境界非司空表聖可比也

張 勻

勻字宣衡號鵲山秀水諸生有鵲山堂集

鵲李詩繫 鵲山年十二作稗史今所傳平山冷燕是也又爲傳奇有十美图長生樂二十種臨卒書云赤剝來時赤剝還放開笑口任顛頑還時更不依前路跳躡瓊樓海上山

陳元龍

元龍字廣陵號乾齋海寧人康熙乙丑榜眼官至大學士諡文簡

蓮坡詩話 海寧陳文簡公元龍與家大人爲總角交

康熙癸丑秋予告歸里過水西莊登覽之餘重叙疇昔
置酒徵歌流連竟日有留贈詩云停舟話舊暫淹留把
臂相看兩白頭湖海寓公成大隱冰霜勞客遂三休徵
歌曲罷聞吳咏投轄情殷滯衛流共倚軒窗還惜別鳳
城不遠有丹邱載愛日堂集先祖少尹公舊藏陳章侯
蓮鷺圖絕去筆墨町畦一掃凡近海寧陳相國元龍題
云墨花吹得綠差差小景分來太液池白鷺不飛蓮不
謝搖烟立雨已多時初白老人題云蓮吾愛其潔鷺吾
愛其白持將不染心配此一拳石 煙草前人無咏之
者韓慕廬宗伯掌翰林院事時曾命門人賦淡芭蕉

淡芭蕉

菰煙草名見
姚旅露書

詩多不傳惟慈谿鄭太守梁爲庶常時所
作存玉堂集中海寧陳文簡公有五律四首備錄之神
農不及見博物幾曾聞似吐仙翁火初疑異草薰充腸
無滓濁出口有細縕妙趣偏相憶縈喉一朶雲又異種
來西域流傳入漢家醉人無藉酒欸客未輸茶莖合名
承露囊應號辟邪閒來頻吐納攝衛比餐霞又細管通
呼吸微噓一縷煙味從無味得情豈有情牽益氣驅朝
霧清心却晝眠誰知飲食外別有意中緣又清氣滌昏
懨精華任咀含吸虛能化實嘗苦有餘甘燭火寒能却
長吁意似酣良宵人寂寞藉爾助高談

仇兆鰲

兆鰲字滄柱鄞人康熙乙丑進士由翰林歷官吏部侍郎

見聞隨錄 滄柱雖不脫聲華逐逐之習而疏論經旨
娓娓引伸每至累紙似與肆叫號而掩空疎者稍稍不
侔矣中康熙乙丑進士累官吏部左侍郎兼翰林院學
士蘇州知府陳公鵬年爲江督噶禮所劾論死兆鰲於
會議時昌言其冤尋得釋以病乞假年八十卒所著有
杜詩詳註行世又著參同契悟真篇集註頗惑於陰陽
採戰之術嘗於京師娶馬氏女爲妾尋遣還作詩曰採

葯須求北地花丹經錯認玉生芽蘇臺凋後燕臺繼悔
恨當年養鼎差晚年蓋自悟其失蘇臺燕臺指先時二
妾之亡者也

金嗣孫

嗣孫字龍友秀水人諸生著有鐵巖集

詩衡 凡作宮詞必切時事纔無膚浮之病金鐵巖正
德宮詞云月射紗窗映畫梁芙蓉闕北鬱金香西宮今
夜停歌舞聞道官家宿豹房天啟宮詞云玲瓏玉束繫
絛綃素腕雙擎碧玉簫萬壽山頭歌急拍一聲聲唱洛
陽橋懷宗宮詞云雉扇乘雲啟鳳樓特宣命婦拜長秋

賜來穀雨新茶白景泰盤盛宣德甌不獨工麗擅場當
與王仲初韻頡千古

湯右曾

右曾字西崖仁和人康熙戊辰進士官至吏部
右侍郎有懷清堂集

懷清堂集序

常安撰

先生少壯通籍歷官清要典文章

備顧問上寵遇特隆所著文官果詩嘗得 睿藻賜

和又 命隨諸王大臣遊避暑山莊一時異數 朝右

莫不欣羨其榮其所爲詩皆溫柔敦厚卓然爲南邦之
秀先生爲少宰者九年余時備員比部恒接聲歎茲來

撫浙歲乙丑先生子孔茹孫融書謀鏤先生之遺集而
黃崑圃潘晴巖兩先生共助成之丙寅冬始告竣凡得
古今體詩二十卷

浙江通志 右曾奉 命賦文官果詩蒙 御製一首
俯同右曾韻有茸香葉密待詩公之句舉朝傳誦以爲
儒臣之至榮右曾詩高超名貴不落一語凡近在黔有
使黔草在豫有嵩洛吟在奉天有遼海集並行於世晚
年益歸蒼老語輒驚人

本朝名家詩鈔小傳 湯右曾登進士入史館名重一
時丙子典貴州試號得人久改禮垣提督河南學政居

官三載囊不名一錢驟遷卿尹再入翰林掌院事嗣以
吏部侍郎教習庶吉士又數年卒京邸西厓少卽工詩
清遠鮮潤一洗西陵習派使黔後風格益進大抵溫雅
以發其情爽朗以達其氣鍛鍊澄汰神韻泠然而詩品
復乎無上矣

陸寅

寅字冠周錢唐人麗京子康熙戊辰進士

青瑤詩話 冠周高士麗京之子麗京出亡不歸冠周
訪父幾遍宇內終不得幽憂畢生少歲卽有豫章拔地
之勢遭困厄詩品愈高刊文集時名未成也戊辰後詩

無刊本故未得見今錄其自笑云自笑桑弧志天涯只
布衣刈家翻是客逆旅豈如歸白日從愁盡青山入夢
非緘書與僮僕爲婦釣魚磯冬夜雜感云憔悴相憐賴
布衣董生子異韋丈鳳信音稀十年聚散兼生死千古文
章定是非村犬隔籬空吠影海鷗爭浴日忘機高山流
水成惆悵一片寒雲凍不飛

國朝兩浙詩鈔 冠周嘗於康熙丁巳夏客長安市有
鬻爬背麻姑爪者視其桿有宣德八年餘干縣所貢竹
箭字後無所用散落民間改爲爬背之具乃作歌云長
安城東鬻廢箭故老歛歛萬人看金鏃敲殘鼓鑄鋒雅

翎落盡丹黃變棄擲風塵未嘗試老桿分明宣德字珍
惜曾教武庫藏標題尚識良工製高皇昔日戎衣著劍
掃妖氛定雄畧已見蒲梢入大宛更聞菊醬開耶笮茫
茫九服初通貢竹箭東南待絃控包茅常例豫章來司
空檄取官胥送貽謀孫子但垂衣夜夜黃星護紫微三
殿日高香不散上林花暖燕羣飛夕烽并罷平安火服
御深宮無一可青瑩燒出碧鷄城熏爐製就黃金裏內
家擎獻龍顏動流落人間至今重金馬銅駝倏已非石
砮槩矢成何用只今新製逾工巧故物休言舊時好猛
將難調神臂弓仙人且代麻姑爪君不見銀泉山下草

蕭蕭狐兔秋原正寂寥仰天大笑羽毛落一箭穿雲看射雕

查昇

昇字仲韋一字聲山海寧人康熙戊辰進士選庶吉士授編修累官至詹事府少詹事

徐倬查昇傳 昇負詩文盛名尤工書法片楮隻字人爭寶貴之所著姓氏譜靜學齋詩稿尺牘偶存前扈從詩 南巡五瑞詩塞北紀 恩賦行世

炙硯瑣談 海寧查少詹仲韋昇飲陳樸菴席上賦壯丹云置身富貴何須早到眼雲霞覺倍明時推擅塲壯

丹用富貴字本常語少詹不着色相自得風流異乎多
買臙脂者

國朝兩浙詩鈔 聲山所著詩一名澹遠堂集集中有
訪吳來山不值一首云秋水乘孤艇沿綠亂葦間時看
黃葉落境共白鷗閒林隱溪邊屋鐘聲雲外山故人今
不見月出棹歌還

童申祉

申祉字百旃海鹽人諸生

櫟李詩繫 百旃與彭孫貽齊名而詩篇散軼所見惟
孟子詩十章而已其句踐事吳云陣雲初散日沈西銜

壁歸來保會稽採葛山頭看狡兔百花洲上聽晨雞捧
心妃子方沈醉嘗胆君臣共慘悽一曲堂堂歌未歇殘
兵已過越來溪

詩衡 商寶意詩君王自是堪亡國一聯與百旃捧心
妃子二句同是兩面夾寫法而百旃詩意較爲含蓄

鄭 梁

梁字禹梅又字寒村慈谿人康熙戊辰進士選
庶吉士改戶部主事歷郎中出知高州府

浙江通志 梁嘗學於黃宗羲聞戴山劉先生諸編寓
意於藝文詩類江門定山文近震川宗羲亟稱之復善

畫旣歸里旋得末疾右體不隨遂以左筆驅染如平時
跌宕文史人目爲仙吏云

高孝本

孝本字大立嘉興人康熙辛未進士終績溪縣

知縣

浙江通志 孝本生平作詩甚富由登岱以迄遊台蕩
諸山凡十七集其詩以遊而進晚歲自訂固哉叟未刪
稿外存古三都賦二卷愚夫論二卷遊記二卷家傳一
卷

錢肇修

肇修字石臣錢塘人康熙辛未進士官御史有
逸莪集前出塞集杏山近草

雲護齋詩話 集中有前後出塞詩其自序云予於戊
辰之夏入籍遼陽有前出塞詩辛未成進士再至奉天
始葺廬舍置阪田買牛播種爲久住計得盛京竹枝詞
百首然湯少宰贈詩有歸日清陰還待我兩家同占綠
楊春之句則侍御晚年尚戀戀粉榆不欲輕去其鄉可
見矣

姜宸英

宸英字西溟慈谿人康熙丁丑進士廷試一甲

第三授編修時年七十有葦間詩集

居易錄 姜西溟詩云通志堂前前日見生綃一幅似
桃源不知神物歸何處留得青衫舊酒痕跋云曾見松
雪公水村圖主人零落此圖遂不可復問矣或云已入
秘府余一日入朝待漏偶與陳說巖大司空談及云曾
於大內見松雪真蹟後有元人題跋甚多蓋卽姜所
云也

蓮坡詩話 姜西溟編修久遊沽水吟咏頗多有宜亭
詩云不知秋遠近水色漲平蕪晒岸多漁網浮舟半竹
盧橋欹眠折葦櫬倒坐閒鳬落日宜亭上寥寥我輩俱

著有湛園未定稿

槐塘詩話 丁五狀元李蟠字根大文思遲澁當廷試

日諸進士薄暮皆出而蟠獨留殿前護軍催督甚急蟠
曰畢生之業在此一朝幸毋相促以成鄙人功名護軍
哂詰直至四鼓始獲呈卷 上廉知之以爲苦心之事
拔置一甲一名同榜探花則慈谿姜宸英也姜作五言
戲贈云望重彭城郡名高進士科儀容如絳勃刀筆似
蕭何水下還添子蟲邊更著番一般難學處三十六餛
餅蟠偉軀虬鬚狀似武人其爲諸生時以刀筆聞廷試
日懷麪餅三十六枚餐之至盡餛餅都下方言也

按西溟知遇最晚年七十始中式一甲第三名補授
編修余嘗於友人處見西溟小像一幅梧竹數本瘦
石一拳西溟則跌坐其下有湯西崖題五古一章甚
佳多惋惜沈淪之語蓋其未遇時所畫者也西溟湛
深經史之學故爲文有根柢而書法迥秀絕倫能窺
鍾王門戶於唐宋諸家亦靡不臨摹殆徧仙骨珊瑚
風神絕世當在
聳山子文之上

章兆曾

兆曾字梅湖會稽人官澄海令

越風 梅湖過紅鵝庄云青驄嘶過紅鵝店回首溪橋
半夕陽青驄紅鵝掩映生姿却又大方

朱樟

樟字鹿田號灌畦錢塘人康熙己卯舉人山西

澤州府知府

隨園詩話 乾隆初杭州詩酒之會最盛名士杭厲之外則有朱鹿田樟吳甌亭城汪抱樸臺金江聲志章張鵞洲瀄施竹田安周穆門京每到西湖堤上倚裳聯襪若屏風然有明中讓山兩詩僧留宿古寺詩成傳鈔紙價爲貴南屏坐雨朱云一角山昏秋欲晚滿窗葉戰雨來初張云荷聲冷帶跳珠雨鐸語遙飛潑墨山汪云雲氣半遮山下塔秋光早入水邊村施云濃雲擁樹湖先暝涼雨到窗山欲鷹讓山句如多情無過鳥到處似留人室敞許雲住竹深無暑通樹聲滿壑秋初到山影一

池泉洗青明中句如燒烟隔岸水猶靜初日到窗山自
移皆可愛也四十年來儒釋兩門一齊寂滅竟無繼起
者

國朝兩浙詩鈔 乾隆庚午春仲湖上埽周穆門墓用
皮襲美弔張處士韻同人作者甚多鹿田詩云空憐修
夜鬱青霞馬鬣纔封過客嗟窆石已刊題墓字短牆低
露守墳家青烘碧草摧蕙葉風軟春旗落杏花慚愧對
君稱後死吾生轉自苦無涯

楊知

知一名守知字次也海寧人雍正孫康熙庚辰

進士官平涼府擢南河觀察

隨園詩話

次也貧窮潦倒老益熒熒無藉嘗過江寧

謁尹制軍繼善尹見其精神矍鑠甚欽羨之楊曰夕陽無限好只是近黃昏語訖淒然淚下尹曰先生獨不聞天意憐幽草人間重晚晴乎楊遂破涕爲笑而別語人曰小尹吐屬固是不凡蓋尹自幼聰敏同社嘗稱爲小尹云 水仙花詩無佳者楊次也先生七律前半首云汀蘅洲草伴無多以水爲家奈冷何生意不須沾寸土通詞直欲託微波余按焦氏易林云鳬雁啞啞以水爲家楊暗用之而使人不覺可爲用典者法

陶尊孟

尊孟字止敬號山漁會稽布衣

荊坡詩話 山漁公乃余曾叔祖年八十餘吟不倦嘗
與社友作老馬詩衆人皆竭力摹寫老態殊少警句公
詩云自從伯樂顧青眸奔電追風數十秋齒長幾何君
莫問沙塲舊主早封侯不言老而老字已透此謂詠物
傳神之筆

查嗣琛

嗣琛字德尹號查浦海寧人康熙庚辰進士官

翰林院侍講有查浦詩鈔

槐塘詩話

顧俠君嗣立入都寓宣武門三忠祠內小

屋數椽繞屋花木扶蘇可愛因屬查杳浦嗣琛顏之曰
小秀埜自題二絕云數間小屋傍城西紙閣屏風新品
題堪笑生涯同燕子春深到處好添泥草堂春柳正髣
髵芍藥紅蘭漸著花生怕夢歸難識路却教移得到京
華日下名流屬和甚衆杳浦詩一片波光拂檻流西山
晴翠壓牆頭書聲燈影微茫裏差勝蘇州隔秀州阮亭
詩前身慧業應金粟家世風流是玉仙他日凌風一相
訪閒吹鐵笛過雲間新卜瓜廬鄆社旁也知邱壑道難
忘移來妙喜須臾事況有青山似故鄉姜西溟宸英詩

小園新占在城西依舊蓬蒿三徑迷或恐羊求來未識
鹿柴莫泝自留題孫愷似致彌詩斜枕銀灣背碧城聞
門曲折小窗明渾忘宣武街前閭只似閭邱坊裏行張
超然遠詩僦居扃櫺似山齋廟市花時亦自佳小秀埜
如真秀埜上斜街接下斜街陸居非屋水非舟種得芭
蕉待好秋米貴長安休悵惘人間猶有望京樓宮及鹿
鴻立詩宣武門坊二尺泥棘花風緊雨濛迷騎驢看客
非君事且築新豐續舊題宋山言至詩城隅僻絕足棲
遲風物江南繫客思垂柳更添三兩樹草堂也似我西
陂方拱樞辰詩望裏西山過雨痕溪光樹色映清樽與

君一巷分南北索醉尋花要欵門柯南陔煜詩街南陴
尺通花市屋後連環抱玉河料理西窗添六扇手招山
翠入行窩劉介于石齡詩三忠祠近城西路丈室能如
秀壑清從此帝京書景物便須添箇草堂名

陸師

師字麟度歸安人康熙庚辰進士官至衮寧道
蓮坡詩話 歸安陸巢雲師卧病寓齋偶咏云悠然木
榻寄僧寮靜裏聞鐘轉寂寥暖律倦吹寒谷熱朔風偏
助病魔驕醫多變症非方誤酒剩空囊亦興消只有短
檠憐客苦半明半滅伴深宵風調酷肖龜堂老子

吳越所見書畫錄 王司農意止齋圖卷原祁爲龔石
帆作石帆名秉直字敬六乃吾鄉之耆舊名宿鎮洋縣
志儒林文學耆碩中俱不載是何意也此卷有蒼州陸
師題云披圖我亦憶柴荆滿紙山光溪水聲揚子一亭
堪問字蔣生三徑豈逃名沙磯合有垂綸手第舍嘗閒
煮藥鎰他日約君歸隱去東風到處杖藜輕不愛山居
愛水居榜門宜更署凌虛漁舟箇箇聞歸棹燕語年年
認舊廬紅惜桃花拚自醉碧憐芳草莫輕鋤遂初雖賦
猶嫌早藜閣遲君校秘書

按麟度所爲制義貽炙人口然少血性語及觀其麟
雨詩有云一官衣食寄閭閻何忍鞭箠等犬獺又云

黃昏縱謝四知金白日虛糜五斗粟此其居官時所作也沈摯纏綿詩優於文遠矣所著名玉屏山樵吟

杏慎行

慎行字夏重又字悔餘號初白海寧人康熙癸未進士官翰林院編修有敬業堂集

蓮坡詩話 作詩好用經語亦是一病老杜詩致遠思恐泥東坡寫此詩到此句云此詩不足爲法家初白老人有秋花詩云雨後秋花到眼明閒中扶杖繞堦行畫工那識天然趣傳粉調朱事寫生此詩可與前意參看家伯初白老人嘗教余詩律謂詩之厚在意不在辭詩之雄在氣不在直詩之靈在空不在巧詩之淡在脫

不在易須辨毫髮於疑似之間餘可類推所著敬業堂
集中分小大集多至十餘種宋人惟楊誠齋有之老人
歸田以及患難又有餘生詔獄生還三集家七倫弟列
於嘉善老人有句云座中放論歸長悔醉裏題詩醒自
嫌又人來絕域原拚命事到傷心每怕真余每喜誦之
又有花朝晴示僧道楷詩云初日烘雲碎作霞討春人
競出江涯老來不喜閒桃李別約山僧看菜花此與魏
野所作城裏爭看城外花獨來城裏訪僧家殷勤覓得
新鑽火爲我旋烹岳麓茶意相似 初白句雪飄燈事
闌珊後春到梅花淺淡間查浦句庭烏得食每雙下鄰

大驚人時一喧皆可以參禪意

本朝名家詩鈔小傳 先生繼長水新城後而稱詩伯
一時壇坫於斯爲盛嘗教人作詩謂詩之厚在意不在
詞詩之雄在氣不在貌詩之靈在空不在巧詩之淡在
脫不在易誠詞苑之良規學海之寶筏嘗有句云座中
放論歸長悔醉裏題詩醒自嫌又人來絕域原拚命事
到傷心每怕真俯仰情深殆與玉局無二

槐塘詩話 海寧查編修夏重慎行在翰苑日 聖祖

幸海寧捕魚賜羣臣命賦謝恩詩編修落句云笠簷蓑
袂平生夢臣本烟波一釣徒詞意稱旨忽奉內侍傳烟

波釣徒查翰林蓋同時有聲山學士故以詩分別之此
與唐韓翃春城無處不飛花可同作玉堂佳話也

金輅

輅字以賓號素亭蕭山人歲貢生授安吉州訓
導

海嶼詩話 公爲人質樸端方詩却清新流麗綽有風
神嘗題桃花扇一絕云燕子春燈金寂寥梅花孤塚雨
瀟瀟風流只有藍田叔剩水殘山畫六朝又贈毛大可
云從古毛公善說詩肯教八斗讓陳思淮陰紙價高於
洛競寫明河絕妙辭

陳至言

至言字青厓號山堂蕭山人康熙癸未進士選
庶吉士授編修出爲河南學政著有苑青閣集
浙江通志 至言幼工詩古文與同郡張邇可齊名毛
奇齡數稱之謂能守古人三義八法之意而不變所謂
工生於才達生於明者

按山堂太史初冠時英氣騰上遇一地師自言得堪輿秘旨擇地有奇驗太史曰吾先人未葬欲求吉壤以妥先靈至發祥之說必余及身得之乃爲佳耳地師曰是不難紹郡地氣厚而緩求速驗當在杭州遂同西渡卜居於西湖法相寺右曰此地十年君當貴顯柳成太史夜卧其中氣蒸鬱如火明日遂納棺封其穴越十年果登第授翰林院庶吉士又數年以編修視學河南生平廣交遊吳越名下士悉共敦槃嘗

分校禮闈桐城方苞茶陵彭維新皆出其門下方素
同文社以會元自負太史習見其文闈中得卷一本
熟視之曰此文雄深雅健必靈皋也薦爲元拆彌封
果靈皋自謂老眼無花甚喜主司置第六榜發方以
不得會元快快不樂怨太史太史曰吾非不知文者
奈主司何嗣是兩人轉疏濶方旋以友事牽連獲罪
戍遼東而太史亦赴豫卒於官太史詩和平溫雅媚
秀絕倫譽盛一時至今詞壇論吾施詩人者必首及
之
又按公此屬秀麗七律佳句尤多如盤中芍藥調新
婦山下蘼蕪問故夫沙苑馬肥青苜蓿涼州人醉綠
葡萄殘雨白遮雲外樹落霞紅帶晚來潮沙村
白舫橫官渡瓦閣紅燈出女牆皆是晚唐神髓